

Forskrift om regionale miljøtilskot i jordbruket, Vestland.

Tittel: «Forskrift om regionale miljøtilskot i jordbruket, Vestland.»

Heimel: «LOV-1995-05-12-23-§3, LOV-1995-05-12-23-§18, FOR-2018-11-23-1751 delegering av myndighet til statsforvaltaren etter jordlova § 18 gjeve av Landbruks- og matdepartementet»

Kapittel 1 Innleiande føresegner

§ 1 Formål

Formålet med tilskot etter forskrifta er å bidra til å ta vare på jordbruket sitt kulturlandskap, biologisk mangfald, kulturmiljø og kulturminne, jord og jordhelse, tilgjenge i jordbrukslandskapet, samt redusere bruk av plantevernmidlar, utslepp til luft og avrenning til vatn frå jordbruket.

§ 2 Verkeområde

Forskrifta gjeld i Vestland fylke.

§ 3 Grunnvilkår

Tilskot etter denne forskrifta kan gjevast til

- a) føretak som har gjennomført tiltak på areal dei disponerer i søknadsåret eller gjennomført klimarådgeving sidan førre søknadsfrist. Føretaket må drive vanleg jordbruksproduksjon på ein eller fleire landbrukseigedomar, og må vere registrert i Einingsregisteret.
- b) beitelag kan søkje tilskot for drift etter § 5 Drift av beitelag. I denne forskrifta er beitelag avgrensa til å gjelde samanslutningar som er registrerte som samvirkeføretak eller foreining i Einingsregisteret, og som har til hovudføre mål å samarbeide om føremålstenlege fellesløyser innan beitebruk og god utnytting av utmarksbeite.

Kapittel 2 Kulturlandskap

§ 4 Drift av bratt areal

Det kan gjevast tilskot for drift av jordbruksareal med hellingsgrad på 1:5 eller brattare for å ta vare på kulturlandskapet.

Tilskotet kan gjevast for fulldyrka og overflatedyrka grasareal i drift, og for hagebruksareal i drift med næringsføremål. Fulldyrka og overflatedyrka grasareal skal haustast ved slått til dyrefôr minst ein gong i vekstsesongen. Areal med fleirårige hagebruksvekstar skal vere i aktiv drift med naudsynt skjøtsel av frukttre/bærbuskar/staudar, slått av undervegetasjonen minst ein gong i vekstsesongen, hausting og omsetting av frukt/bær/urter, eller omsetting av foredla produkt basert på frukt/bær/urter frå godkjent areal. Areal med eittårige hagebruksvekstar skal vere i aktiv drift med naudsynt skjøtsel, gjødsling, ugrasreinhald, hausting og omsetting av vekstar, eller omsetting av foredla produkt basert på vekstar frå godkjent areal. For omsetting av foredla produkt gjeld same omsetningskrav som for produksjonstilskot.

Tiltaksklassar: Overflatedyrka og fulldyrka 1:5, Overflatedyrka og fulldyrka 1:3, Fruktdyrking 1:5 og Fruktdyrking 1:3.

Tilskotet blir fastsett per dekar.

§ 5 Drift av beitelag

Det kan gjevast tilskot for drift av beitelag som oppfyller vilkåra i § 3b.

For at tilskot skal kunne tildelast må beitelaget ha minst 2 medlemmar, dyra må ha vore minst 5 veker på utmarksbeite, beitelaget må ha organisert tilsyn og sanking tilpassa lokale tilhøve, og beitelaget må ha levert inn årsrapport i, eller som vedlegg til, søknaden. Årsrapporten skal innehalde 1) dato for årsmøte i søknadsåret, 2) sum midlar på konto per 1. november i søknadsåret og 3) kort årsmelding som syner aktivitet i beitelaget og målretta bruk av midlar for beitebruk i utmark i søknadsåret, samt eventuelle utfordringar for beitelaget og beitebruken.

Tiltaksklassar: Storfe/hest og Småfe.

Tilskotet blir fastsett per dyr som er sleppt på utmarksbeite.

§ 6 Beiting av verdifulle jordbrukslandskap i innmark

Det kan gjevast tilskot for skjøtelsbeiting av verdifulle jordbruksareal.

Tiltaket gjeld ammegeit, kje, bukkar og kastratar av geit som beiter minst 5 veker på inngjerda innmarksbeite som ikkje vert slått, beitepussa eller gjødsla. Innmarksbeitet skal bere preg av attgroing og ha innslag av busker og/eller renningar av tre ved beitestart. Skjøtelsbeitinga skal gjennomførast med høveleg beitestrykk. Beitinga skal kombinerast med manuell skjøtsel slik at ringborka og døyande tre vert felte, og at felt virke blir fjerna eller lagra diskret i terrenget. Bilde av beitet ved beitestart skal leggjast ved søknaden.

Tilskotsavgrensing: Det kan berre gjevast tilskot for eit areal i maksimalt 5 år. Tiltaket er avgrensa til ugjødsla innmarksbeite då desse jordbruksareala har størst potensiale for biologisk mangfald og er mest attgroingstruga med fare for tap av matproduserande areal, ope landskap og biologiske verdiar.

Innmarksbeitet skal ha vore ute av drift eller ekstensivt drive slik at skjøtselsbeitinga kan bidra til å berge dei over nemnde verdiane.

Tilskotet blir fastsett per dyr.

§ 7 Beiting av verdifulle jordbrukslandskap i utmark

Det kan gjevast tilskot for beiting av verdifulle jordbrukslandskap i utmark.

Tiltaket gjeld storfe som beiter minst 5 veker i utmark.

Tiltaksklasse: Storfe/hest.

Tilskotet blir fastsett per dyr.

§ 8 Slått av verdifulle jordbrukslandskap

Det kan gjevast tilskot for slått av fulldyrka eller overflatedyrka areal utan vegforbinding eller tilkomst med bilferje for å oppretthalde verdifulle jordbrukslandskap.

Arealet skal haustast ved slått til dyrefôr minst ein gong i vekstsesongen.

Tilskotsavgrensing: Det kan gjevast tilskot for maksimum 30 dekar per føretak.

Tilskotet blir fastsett per dekar.

Kapittel 3 Biologisk mangfald

§ 9 Slått av slåttemark

Det kan gjevast tilskot for slått av slåttemark og lauveng som er gjennomført slik at naturtypen blir teke vare på eller forbetra.

Arealet det blir gitt tilskot for skal ikkje vere gjødsla, jordarbeida eller sprøyta med plantevernmidlar. Areala skal vere registrerte i miljødatabasen Naturbase som slåttemark eller lauveng.

Tilskotsavgrensing: Det kan gjevast tilskot for maksimum 40 dekar per føretak. Føretak som mottek dette tilskotet kan ikkje i same søknadsomgang gjevast tilskot for same areal etter *§ 14 Soner for pollinerande insekt.*

Tiltaksklassar: Svært viktig, Viktig og Lokalt viktig.

Tilskotet blir fastsett per dekar. Dersom lokaliteten er mindre enn 1 daa, kan det søkast om 1 daa.

§ 10 Beiting av kystlynghei

Det kan gjevast tilskot for beiting av kystlynghei som er gjennomført med tilpassa beitetrykk slik at naturtypen blir teke vare på eller forbetra og at landskapet ber preg av beiting.

Arealet det blir gitt tilskot for skal ikkje vera gjødsla, jordarbeidd eller sprøyta med plantevernmidlar. Kystlyngheia skal vere registrert i miljødatabasen Naturbase. Det er krav om minst 3 månader vinterbeiting med tilstrekkeleg og tilpassa beitetrykk.

Tilskotsavgrensing: Det kan gjevast tilskot for maksimum 500 dekar per føretak.

Tiltaksklassar: Svært viktig, Viktig og Lokalt viktig.

Tilskotet blir fastsett per dekar.

§ 11 Brenning av kystlynghei

Det kan gjevast tilskot for brenning av kystlynghei som er gjennomført slik at naturtypen blir teke vare på eller forbetra. Tilskotet kan berre gjevast som eit tillegg til tilskot etter § 10 Beiting av kystlynghei.

Brenninga skal utførast i tidsrommet mellom 15.september og 15.april og etter avklaring med lokalt brannvesen. Brenninga skal vere godt planlagt, den skal gjennomførast på ein forsvarleg måte og i samsvar med skjøtselsråd fastsett av Statsforvaltaren. Tilskotet kan berre gjevast for areal som er brent etter søknadsfristen i føregåande søknadsomgang, og det kan ikkje gjevast tilskot for brenning av same areal oftare enn kvart 10. år.

Tilskotsavgrensing: Det kan gjevast tilskot for maksimum 500 dekar per føretak.

Tilskotet blir fastsett per dekar.

§ 12 Skjøtsel av truga naturtypar

Det kan gjevast tilskot for beite av naturbeitemark og hagemark i jordbrukslandskapet som er gjennomført slik at det biologiske mangfaldet i naturtypen blir teke vare på eller forbetra.

Arealet det blir gitt tilskot for skal ikkje vere gjødsla, jordarbeidd eller sprøyta med plantevernmidlar. Areala skal vere registrerte i miljødatabasen Naturbase. Arealet skal beitast med høveleg beitetrykk.

Tilskotsavgrensing: Det kan gjevast tilskot for maksimum 70 dekar per føretak. Føretak som mottek dette tilskotet kan ikkje i same søknadsomgang gjevast tilskot for same areal etter § 14 Soner for pollinerande insekt.

Tiltaksklasse: Beiting.

Tilskotet blir fastsett per dekar.

§ 13 Skjøtsel av styvingstre

Det kan gjevast tilskot for styving av tre som er gjennomført på ein skånsam måte slik at trea sitt særpreg og biologiske mangfald blir teke vare på.

Tilskotet kan berre gjevast det året treet vert styva. Kappa greiner og lauv må fjernast frå området slik at det framstår som ryddig og stelt.

Tilskotsavgrensing: Det kan gjevast tilskot for maksimum 70 tre per føretak. Det kan ikkje løyvast tilskot for same styvingstre oftare enn kvart femte år.

Tilskotet blir fastsett per tre.

§ 14 Soner for pollinerande insekt.

Tiltaket gjeld berre i Lærdal kommune. Det kan gjevast tilskot for å skjømte pollinatorvennlege soner på jordbruksareal eller på areal som grensar til jordbruksareal. Sonene må ha pollinatorvennlege blomster gjennom vekstsesongen. Arealet det blir gitt tilskot for skal ikkje vere gjødsla eller sprøytta med plantevernmidlar. Ei sone skal vere minst 2 meter brei, og sona skal slåast og/eller beitast.

For å kunne søkje tilskotet, må ein melde frå til kommunen innan 10. juni. Det blir ikkje gitt tilskot for areal som er dominert av ugras som kan utgjere problem i grasdyrking.

Tilskotsavgrensing: Det kan gjevast tilskot for maksimum 600 meter per føretak. Føretak som mottok dette tilskotet kan ikkje i same søknadsomgang gjevast tilskot for same areal etter § 9 Slått av slåttemark eller § 12 Skjøtsel av truga naturtypar.

Tiltaksklasse: Tilgrensande kantsone

§ 15 Tilrettelegging av hekke- og beiteområde for fugl

Det kan gjevast tilskot for å leggje til rette for hekking av dei truga fugleartane vipe, åkerrikse og storspove på jordbruksareal i aktiv drift.

Tiltaket gjeld tilrettelegging på fulldyrka areal, overflatedyrka areal og innmarksbeite. Tiltaket gjeld ikkje areal som vert sprøytta med ugrasmiddel i søknadsåret. Arealet det blir gitt tilskot for skal ha påviste reir med egg av vipe, åkerrikse eller storspove. Søkar må dokumentere markerte reir med datomerka bilde som vert lagt ved søknaden, og markerte reir må takast omsyn til gjennom heile hekkinga (låg tilrettelegging). For høg tilrettelegging må søkar i tillegg kunne dokumentere utsett slått med datomerka bilde.

Tilskotsavgrensing: Det kan berre gjevast tilskot etter høg tilrettelegging for areal som også oppfyller krava for låg tilrettelegging. Det kan gjevast maksimum kr 20 000 i tilskot per føretak.

Tiltaksklassar: Låg tilrettelegging og Høg tilrettelegging

Tilskotet blir fastsett per dekar (1 dekar per reir).

Kapittel 4 Kulturminne og kulturmiljø

§ 16 Drift av seter

Det kan gjevast tilskot for drift av stølsanlegg med mjølkeproduksjon.

Produksjonsperioden skal vare i minst fire veker per støl per sesong. Mjølka som blir produsert skal leverast til meieri eller foredlast på stølen. Produksjonen skal tilsvare minimum 45 liter kumjøl, 25 liter geitemjøl eller 15 liter sauemjøl i døgnet per støl. Det vesentlege av næringstrongen til dyra skal vere dekkja gjennom beiting.

Ein støl skal ha eige driftsapparat, og beiteområda som dyra nyttar i samband med stølsdrifta skal ikkje overlapp med beita som dyra ville ha nytta i samband med mjølking i hovuddriftsbygningen på føretaket. Mobile mjølkestallar kan godkjennast innan stølsdrift.

Tilskotsavgrensing: Det kan gjevast tilskot for inntil tre stølar i drift per føretak. For at to stølar skal kunne godkjennast som to stølsanlegg, må det vere minst fire veker stølsdrift på kvar av stølane, produksjonskrava må vere oppfylte for begge stølane, dei må ha kvart sitt driftsapparat, og beiteområda til dei to stølane skal ikkje overlapp med kvarandre.

Tiltaksklassar: *Levering til meieri 4–6 veker, Levering til meieri 6 veker eller meir, Eigen foredling 4–6 veker og Eigen foredling 6 veker eller meir.*

Tilskotet blir fastsett per støl og fordelt på tal føretak som har dyr som inngår i stølsdrifta.

§ 17 Skjøtsel av automatisk freda kulturminne

Det kan gjevast tilskot for skjøtsel av automatisk freda kulturminne etter lov av 9. juni 1978 nr. 50 lov om kulturminner § 4, som grensar til eller ligg på jordbruksareal.

Skjøtselen skal vere gjennomført slik at kulturminnet blir teke vare på og er synleg i jordbrukslandskapet. Kulturminnet skal vere registrert i kulturminnebasen Askeladden.

Tilskotet gjeld for skjøtsel av areal rundt kulturminne, slik som graver og gravfelt, bergkunst/helleristningar, åkerreiner, røyser og røysfelt, buplassar, tufter, vegfår og bygningar. Det kan ikkje løyvast tilskot til lokalitetar som er avmerkte i Askeladden som dyrkingslag og kulturlag, lokalitetar avmerkte som uavklara funnstader, lausfunn og liknande, der skjøtsel ikkje vil medverke til at kulturminnet vert meir synleg i jordbrukslandskapet.

Tilskotsavgrensing: Det kan gjevast maksimum kr 10 000 i tilskot per føretak.

Tiltaksklassar: *Beiting og Slått.*

Tilskotet blir fastsett per dekar. Dersom lokaliteten inkludert sikringssone er mindre enn 1 daa, kan det søkast om 1 daa.

Kapittel 5 Avrenning til vatn

§ 18 Kantsone i eng

Det kan gjevast tilskot for å ha ei kantsone i eng langs kanten mot vassdrag som ikkje er gjødsla eller sprøyta i søknadsåret.

Sona det blir gitt tilskot for, skal ha ei breidde på minimum fire meter målt frå normalvasstanden i vassdraget, der minst to meter ligg på fulldyrka eller overflatedyrka areal. Avstand mellom vassdrag og gjødsselfri kantsone kan ikkje vere meir enn åtte meter.

Kantsona skal haustast ved slått eller beiting i søknadsåret. Jordarbeiding og såing skal ved behov skje mellom 1. mars og 1. juli.

Tilskotsavgrensing: Tilskotet gjeld for fulldyrka og overflatedyrka areal i prioriterte område fastsett og kartfesta av Statsforvaltaren. Det kan gjevast tilskot for maksimum 1000 meter per føretak / 1500 meter per føretak / 2000 meter per føretak.

Tilskotet blir fastsett per meter.

Kapittel 6 Utslepp til luft

§ 19 Spreiing av all husdyrgjødsel om våren og eller i vekstsesongen

Det kan gjevast tilskot for spreiiing av husdyrgjødsel og biorest om våren eller i vekstsesongen. Siste frist for spreiiing er 10. august i søknadsåret. Arealet skal haustast eller beitast etter siste spreiiing i søknadsåret. Det skal minimum spreiiast 5 kg total-Nitrogen i husdyrgjødsla per dekar. Tilskotet kan berre gjevast dersom all husdyrgjødsel som føretaket disponerer blir spreidd om våren eller i vekstsesongen innan fristen.

Føretaket skal ha dokumentasjon i form av gjødslingsplan og skiftenoteringar som syner spreiedato og spreidd gjødselmengd per dekar.

Tilskotsavgrensing: Tiltaket gjeld føretak som disponerer areal i nedbørsfelt for elvemuslingsvassdrag. Tiltaket er avgrensa til føretak med mjølkeproduksjon på storfe, og til føretak med produksjon på gris og fjørfe der produksjonsomfanget er berekna til minst 15 gjødseldyreiningar (GDE). Tiltaket omfattar kun areal som er godkjent for spreiiing av husdyrgjødsel. Det kan maksimalt gjevast tilskot for 250 dekar. Føretak som mottok dette tilskotet kan ikkje i same søknadsomgang gjevast tilskot etter § 20 Nedlegging av husdyrgjødsel, § 21 Nedfelling av husdyrgjødsel eller § 22 Spreiing av husdyrgjødsel med tilførselsslange.

Tiltaksklasse: Spreiing i veksande kultur

Tilskotet blir fastsett per dekar.

§ 20 Nedlegging av husdyrgjødsel

Det kan gjevast tilskot for spreieing av husdyrgjødsel og biorest ved nedlegging. Det skal minimum spreieast 5 kg total-Nitrogen i husdyrgjødsel per dekar. Siste frist for spreieing er 10.august i søknadsåret på det omsøkte arealet. Arealet skal haustast eller beitast etter siste spreieing i søknadsåret.

Føretaket skal ha dokumentasjon i form av gjødslingsplan og skiftenoteringar som syner spreiedato og spreidd gjødselmengd per dekar.

Tilskotsavgrensing: Det kan gjevast tilskot for maksimum 100 dekar per føretak, og tiltaket kan gjelde for alt fulldyrka og overflatedyrka areal som føretaket disponerer. Det er forventa at all husdyrgjødsel på eit areal i ein vekstsesong blir tilført med nedlegging. Eit føretak treng ikkje fylle krava til tilskotet for alt areal det disponerer, men arealet det blir søkt om tilskot for skal fylle alle vilkåra til tilskotet. Føretak som mottek dette tilskotet kan ikkje i same søknadsomgang gjevast tilskot etter § 19 Spreieing av all husdyrgjødsel om våren og eller i vekstsesongen. Føretak som mottek dette tilskotet kan ikkje i same søknadsomgang gjevast tilskot for same areal etter § 21 Nedfelling av husdyrgjødsel.

Tiltaksklassar: Nedlegging i veksande kultur og Nedlegging i veksande kultur ved fleire spreieingar.

Tilskotet blir fastsett per dekar.

§ 21 Nedfelling av husdyrgjødsel

Det kan gjevast tilskot for spreieing av husdyrgjødsel og biorest ved nedfelling. Det skal minimum spreieast 5 kg total-Nitrogen i husdyrgjødsel per dekar. Siste frist for spreieing er 10.august i søknadsåret på det omsøkte arealet. Arealet skal haustast eller beitast etter siste spreieing i søknadsåret.

Føretaket skal ha dokumentasjon i form av gjødslingsplan og skiftenoteringar som syner spreiedato og spreidd gjødselmengd per dekar.

Tilskotsavgrensing: Det kan gjevast tilskot for maksimum 100 dekar per føretak, og tiltaket kan gjelde for alt fulldyrka og overflatedyrka areal som føretaket disponerer. Det er forventa at all husdyrgjødsel på eit areal i ein vekstsesong blir tilført med nedfelling. Eit føretak treng ikkje fylle krava til tilskotet for alt areal det disponerer, men arealet det blir søkt om tilskot for skal fylle alle vilkåra til tilskotet. Føretak som mottek dette tilskotet kan ikkje i same søknadsomgang gjevast tilskot etter § 19 Spreieing av all husdyrgjødsel om våren og eller i vekstsesongen. Føretak som mottek dette tilskotet kan ikkje i same søknadsomgang gjevast tilskot for same areal etter § 20 Nedlegging av husdyrgjødsel.

Tiltaksklassar: Nedfelling i veksande kultur og Nedfelling i veksande kultur ved fleire spreieingar.

Tilskotet blir fastsett per dekar.

§ 22 Spreieing av husdyrgjødsel med tilførselsslange

Det kan gjevast tilskot for spreieing av husdyrgjødsel og biorest med tilførselsslange, som eit tillegg til tilskot etter §§ 20 og 21 Nedlegging av husdyrgjødsel eller Nedfelling av husdyrgjødsel.

Føretaket må kunne dokumentere bruk av tilførselsslange.

Tilskotsavgrensing: Det kan gjevast tilskot for maksimum 100 dekar per føretak. Føretak som mottek dette tilskotet kan ikkje i same søknadsomgang gjevast tilskot etter § 19 Spreiing av all husdyrgjødsel om våren og eller i vekstsesongen.

Tiltaksklassar: Bruk av tilførselsslange og Bruk av tilførselsslange ved fleire spreingar.

Tilskotet blir fastsett per dekar.

Kapittel 7 Plantevern

§ 23 Nedkjemping av ugras i radkultur

Det kan gjevast tilskot for mekanisk nedkjemping av ugras eller flammig i radkultur. Det kan ikkje gjevast tilskot dersom det blir nytta plantevernmiddel mot ugras før hausting, med unntak for nedsviing av potetris.

Økologiske areal og areal i karens som mottar produksjonstilskot for økologisk drift har ikkje rett til tilskot.

Tilskotsavgrensing: Det kan gjevast tilskot for minimum 3 dekar og maksimum 120 dekar per føretak.

Tiltaksklassar: Flammig og Mekanisk nedkjemping av ugras.

Tilskotet blir fastsett per dekar.

Kapittel 8 Jord og jordhelse

§ 24 Fangvekstar sådd etter hausting

Det kan gjevast tilskot for fangvekstar sådd etter tidleg hausting av radkultur. Fangveksten skal vere godt etablert om hausten, og den skal ikkje vere hovudvekst året etter at han er sådd. Arealet skal ikkje sprøytast med plantevernmiddel eller gjødsel om hausten. Arealet skal ikkje jordarbeidast før 1. mars året etter søknadsåret.

Det er tillate med grunn harving eller utjamning av såbedd etter hausting for å sikre god etablering av fangveksten.

Tilskotsavgrensing: Det kan gjevast tilskot for minimum 2 dekar og maksimum 120 dekar per føretak.

Tiltaksklasse: Grønsaker/Potet

Tilskotet blir fastsett per dekar.

Kapittel 9 Miljøavtale og klimarådgeving

§ 25 Miljøavtale

Det kan gjevast tilskot til føretak som gjennomfører ein kombinasjon av tiltak for styrka miljøinnsats i område som er prioritert, fastsett og kartfesta av Statsforvaltaren grunna behov for ekstra tiltak retta mot vasskvalitet. Tiltaket omfattar krava i § 18 *Kantsone i eng* og § 19 *Spreiing av all husdyrgjødsel om våren eller i vekstsesongen*. Tiltaket er planlagt innført tidlegast i 2024.

Tiltaksklassar: Trinn 1 og Trinn 2.

Tilskotet blir fastsett per dekar.

§ 26 Klimarådgeving

Det kan gjevast tilskot for klimarådgeving som er gjennomført i ein søknadsperiode, frå 15. oktober føregåande år til 15. oktober i søknadsåret. Tiltaksplan utarbeidd i samband med utført rådgjeving må leggast ved søknaden. Tiltaksplanen skal vere underskriven av rådgjevar.

Med klimarådgeving meiner vi rådgjeving som i størst mogeleg grad tek for seg ein heilskapleg gjennomgang av utslipp og opptak av klimagassar frå alle produksjonar på føretaket, med sikte på å gjennomføre klimatiltak. Behov for klimatilpassing skal også inngå i rådgjevinga. Tilbydarar av klimarådgeving skal vera godkjende av Landbruksdirektoratet.

Dersom det blir søkt om tilskot for gjennomført klimarådgeving i fleire søknadsperiodar, skal det utarbeidast ein ny tiltaksplan som gjer greie for gjennomførte tiltak frå førre tiltaksplan. Tilskotet kan berre gjevast for ei gjennomført rådgjeving per søknadsomgang.

Tiltaksklassar: To-til-ein rådgjeving, Ein-til-ein rådgjeving og Grupperådgeving

Tilskotet blir fastsett per stykk.

Kapittel 10 Generelle føresegner

§ 27 Utmåling og utbetaling av tilskot

Tilskotet blir rekna ut etter satsar fastsett årleg av statsforvaltaren. Tilskot skal berre gjevast for det året tiltaket blir gjennomført. Det kan gjevast tilskot til tiltaket klimarådgeving som er fullført sidan førre søknadsfrist.

§ 28 Søknad

Føretak som søker tilskot skal nytte søknadsskjema fastsett av Landbruksdirektoratet.

Søknadsfristen er 15. oktober. For beitelag som søker tilskot etter § 3 b) *Drift av beitelag* er fristen 15. november.

Dersom søknaden blir levert etter fristane i andre ledd, blir tilskot redusert med 1 000 kroner per dag inntil 14 dagar etter utløpt frist. Tilskotet kan ikkje overførast til eige eller pant.

Søknadar om regionalt miljøtilskot som er leverte innan søknadsfristen kan bli endra av søkeren innan 29. oktober utan at tilskotet vert redusert. Dette gjeld ikkje søknadar om tilskot etter § 3 b) *Drift av beitelag*.

§ 29 Administrasjon, dispensasjon og klage

Statsforvaltaren administrerer tilskota etter denne forskrifta.

Kommunen gjer vedtak om tilskot. Statsforvaltaren kan i særlege tilfelle dispensere frå føresegnene om tilskot fastsett i denne forskrifta.

Kommunen sitt vedtak kan klagast på til statsforvaltaren. Vedtak fatta av statsforvaltaren i første instans kan klagast på til Landbruksdirektoratet.

§ 30 Opplysningsplikt og kontroll

Den som søker tilskot pliktar å gi alle opplysingar som kommunen, statsforvaltaren og Landbruksdirektoratet finn naudsynt for å kunne forvalte ordninga.

Kommunen, statsforvaltaren og Landbruksdirektoratet kontrollerer at utbetalinga av tilskot er riktig.

Søkjaren har pliktig til å utlevere all bokføring, korrespondanse og nedteikningar som gjeld tilskotet. Opplysingar gitt i samband med søknaden om tilskot kan også bli kontrollerte ved telling og måling på dei eigedomane som føretaket nyttar i drifta.

§ 31 Avkorting ved regelverksbrot mv.

Heile eller delar av det samla tilskotet kan avkortast dersom føretaket

- a) aktlaust eller forsettleg har drive eller driv verksemda i strid med anna regelverk for jordbruksverksemd.
- b) har brote føresegner i forskrift 1. juli 1999 nr. 791 om gjødslingsplanlegging, eller ikkje har ført journal over plantevernmidlar som føretaket har nytta seg av på areala som det disponerer. Journalen skal innehalde opplysningar om namn på plantevernmiddelet som blir brukt, tidspunkt for behandlinga og dosa som er brukt, samt området og veksten som plantevernmiddelet blei brukt på. Tilskotet kan også bli avkorta dersom føretaket ikkje kan leggje fram slike journalar for dei siste tre åra.
- c) knytt til jordbruksarealet det disponerer ikkje har ei vegetasjonssone på minst to meter mot vassdrag med årssikker vassføring, målt horisontalt frå normalvasstanden til vassdraget. Vegetasjonssona kan ikkje bli jordarbeida.
- d) på eller knytt til arealet føretaket disponerer gjer inngrep slik at kulturlandskapet får mindre verdi. Det kan likevel berre bli avkorta for inngrep på eigedommar som føretaket heilt eller delvis disponerer. Dersom anna regelverk ikkje er til hinder for det, kan kommunen likevel godkjenne inngrepet på førehand dersom det reduserer openberre driftsmessige vanskar.

§ 32 Avkorting ved feilopplysningar og oversitting av frist

Dersom føretaket aktlaust eller forsettleg har gitt feil opplysningar i søknaden som har eller ville danna grunnlag for ein urettmessig utbetaling av tilskot for seg sjølv eller andre, kan heile eller delar av det samla tilskotet til føretaket avkortast.

Dersom føretaket ikkje har halde dei fristane som kommunen, statsforvaltaren eller Landbruksdirektoratet har sett for å kunne utføre kontrolloppgåvene sine i medhald av § 30 Opplysningsplikt og kontroll, kan tilskotet avkortast.

§ 33 Tilbakebetaling og renter mv.

Dersom føretaket som følgje av manglande oppfylging av vilkår i denne forskrifta eller av andre grunnar har teke imot ei utbetaling som ikkje er rettkome, kan det feilutbetalte beløpet krevjast tilbakebetalt frå mottakaren eller motreknast i seinare utbetaling av tilskot. Tilsvarande gjeld differansen mellom utbetalt beløp og redusert tilskot som følgje av vedtak om avkorting etter § 31 *Avkorting ved regelverksbrot mv. eller § 32 Avkorting ved feilopplysningar og oversitting av frist.*

For tilbakebetalingskrav kan det krevjast renter når kravet ikkje er innfridd ved forfall. Ved grov aktløyse eller forsett kan renter krevjast frå tidspunktet for utbetalinga av det urettkomne tilskotet. Størrelsen på renta følgjer rentesatsen fastsett med heimel i lov 17. desember 1976 nr. 100 om renter ved forsinka betaling m.m.

Krav frå offentleg myndigheit som kjem ut av føretaket si jordbruksverksemd kan motreknast i seinare utbetalingar av tilskot til føretaket.

§ 34 Ikraftsetjing

Forskrifta trer i kraft 01.07.2023. Samtidig blir FOR-2022-07-01-1298 *Forskrift om regionale miljøtilskot i jordbruket, Vestland oppheva.*